

Trabaonan grandi den construccin ta terminando

Mercado laboral mester worde vigila cu vision

Proyeccion pa temporada venidero ta sumamente importante

ORANJESTAD(AAN)--

"Na e momentonan aki planificacion ta bira un palabra indispensable. Aruba ta para dilanti e reto mas grandi, cu ta e temporada di estabilizacion di economia. Lamentablemente desaroyonan na mundo no ta duna un indicacion claro di loke por spera internacionalmente. Pero desaroyonan local ta muestra, cu cambianan mester bay worde dirigi."

Esaki a keda presenta pa un observador, cu a muestra cu durante ultimo aña Aruba a haya su mes confronta cu abundancia di cupo di trabau a base di tur e proyectonan, cu tabata existi hopi labor den construccin. Esaki a trece cune cu un demando pisa a worde poni ariba mer-

cado laboral. Añadi na e tendencia politico di hinca hopi hende den servicio di Gobierno, mester a importa trahador na gran escala.

Pero un temporada nobo ta spera Aruba, si cambianan drastico no presenta ariba plataforma mundial y existi vueltanan mucho mas dramático.

Si e Guerra den Golfo Persico realmente no bay causa e impacto mundial, cu te awor e ta muestra di lo no causa y si e Guerra den Golfo Persico no resulta den un recesion mundial fuerte, Aruba ainda mester di proyeccion y planificacion pa guia desaroyonan, cu ta dilanti porta.

Pa loke ta trata proyectonan bau construccin, por bisa cu mayoria ta bay keda cla. Esey

kier meen cu e demanda explosivo cu tabata tin den mundo di construccin pa trahador, lo bay baha drasticamente. Na su turno esaki ta significa, cu lo tin mas trahador liber pa ocupa otro cuponan di trabau.

Pa loke ta trata e refinaria, plannan tabata pa e rehabilitacion keda cla e aña aki y e ora por spera cu ta trahador local ta bay laga traha na e refinaria. Si esey no socede y mayoria di e trahadornan permanente keda extranhero, e refinaria no tin significancia pa mercado laboral na Aruba.

Un que otro ta bay trece cune, cu cantidad di trahador extranhero na Aruba lo bay conoce reduccion drastico, pasobra gradualmente e situacion ariba

mercado laboral lo cay den balanza. Lo mester bay estabiliza y esaki lo tin consecuen-

Situacionnan cu a presenta como acompañamento pa e demanda grandi ariba tereno laboral y admision di extranhero, manera den mundo di vivienda, lo mester bay conoce cambio. E mundo di euforia, cu a biba aden durante e ultimo añanan lo bay cambia y comunidad lo mester bay biba cu un realidad nobo.

Manera a worde indica, den e proceso aki mester bay tene cuenta cu cierto aspectonan. Por ehemplo, Gobierno ya tabata papia di e hecho cu situacion financiero ta malo. Awor e

mester tene cuenta cu e cantidad di trahadornan lo baha y cu e lo mester ricibi menos na Loon-belasting.

Tin gran preocupacion pa e temporada cu ta spera Aruba. Si den tempo cu entrada, cupo di trabau y tur asunto cu tabata percura pa un abundancia mucho grandi, no por a duna resultadonan verdadero pa falta di guia y vision, awor mester hala faha mara ora e proceso di estabilizacion cuminsa, a worde splica.

Mientrastanto mester tene na mente, cu e situacion na Medio Oriente por bay tin efectonan mas grandi cu e tabata tin te awor, loke lo tin mas impacto pa Aruba tambe.

Proposicion pa cambio den Eleccion Reina Infantil

ORANJESTAD (AAN) Seleccion di Reina infantil di Aruba su carnaval ta un tradicion pa basta aña caba den programa di S.A.C., un evento hopi grandi cu ta trece hopi hende hunto na e eleccion.

Diasabra ultimo tabata tin eleccion unda 18 popchi bunita cada uno reina riba nan mes a duna un presentacion hopi bunita. Jovencitanan a demostra nan inteligencia den discurso di presentacion no oficial, tur e popchinan a duna bon presentacion un mas mihor.

Mayornan hunto cu organisacionnan a haci hopi gasto pa eleccion, gastonan cu ta core den cierto di florin pa esnan cu menos recurso y miles y miles di florin pa esnan mihor recurso y cu patrosinador.

Riba e eleccion di Diasabra ultimo no tin ningun clase di critica. Pero si tin un proposicion pa S.A.C. of Comité Juvenil di Carnaval.

E proposicion ta losiguiente. Pone un anochi di eleccion di Reina Infantil di Aruba parti den dos categoria. Pre Infantil di 6 pa 8 aña. Infantil di 9 pa 10 aña.

Motibo di e proposicion aki ta cu por tin influencia y te hasta simpatia pa parti di un hurado. Ningun hende por gafa nan mes cu ser un hurado

pa un certamen bo mester por tin simpatia y aprecio pa un di e candidatanan pa bo dune puntuacion halto. Y no mester lubida cu e candidatanan no ta competi contra otro, pero nan ta competi contra e hurado cu ta duna votacion. Mester tene cuenta cu certamen infantil ta hopi diferente cu certamen juvenil y grandi, pasobra cu certamen infantil ta trata di mucha y no mester lubida cu tur mucha ta keda mucha apesar di e diferencia di edad, y juvenil y grandi ta algo completamente diferente cu mucha.

Den e certamen infantil tin mucha hopi chiquito y tin mucha hopi grandi y diferencia di edad y estatura ta hunga un rol importante. Un di e factor cu ta sumamente importante durante un eleccion cu por cu trece influencia riba un hurado, ta cu mucha hopi chiquito (estatura y edad) cu un mucha hopi grandi (estatura y edad).

Ta keda na e hurado pa tuma e decision, sea cu ta pensa cu e candidata chiquito pa ta mas mucha cu candidata grandi cu ta luci mucha grandi. Riba e punto aki a trece e proposicion na S.A.C. y Comité Juvenil di Carnaval.

Algo sumamente importante ta cu pueblo tin cu respecta decision di hurado y acepta e reina cu ser eligi pasobra ta di Aruba su Carnaval e ta.

Despues di investigacion relampago Recherche a detene pandiña cu tabata horta na Saliña Cerca

Alivio pa habitantenan di e barrio

ORANJESTAD(AAN) -- Relaciona cu un serie di robo cu kiebra den e ultimo dianan na Saliña Cerca, porfin miembronan di Recherche a logra atrapa e pandiña cu tabata dedica su mes na esaki.

Diabierna den horanan di mainta, despues di a ricibi informacion valioso encuanto e robonan na Saliña Cerca, miembronan di Recherche a inicia un investigacion cu a culmina na detencion di 6 persona. Tambe miembronan di Recherche a traha proces verbal contra dos incubridor.

Diabierna durante dia a detene practicamente henter e pandiña,

cu mas bien tabata terroriza Saliña Cerca.

Na Noord miembronan di Recherche a detene e hoben J.K.(20), kende a keda encarcela pa robo y kiebra.

Na a dura mucho cu nan a

detene e hoben G.A.E. na Playa tambe pa robo y kiebra. Despues nan a detene e hoben P.H.(22), kende tabata traha na un hotel bao construccin riba Boulevard.

Na Bakval e miembronan di Recherche a detene un otro miembro di e pandiña, e hoben E.F.(21), kende tambe a keda en-carcela.

Den horanan di anochi, miembronan di Recherche a interroga e hombre E.v.d.B. kende a duna di conoce cu el a cumpra un television for di E.F.

A resulta cu e television aki ta procedente di un robo cometi na un cas situa na Saliña Cerca. Miembronan di Recherche a confisca e television y despues cu un proces verbal a worde traha, v.d.B. por a bay cas.

Tambe miembronan di Recherche a detene e hombre G.L.(23). Investigacion a muestra cu G.L. a cumpra un radio cassette player for E.F. E aparato aki tambe a keda confisca y despues cu un proces verbal a worde traha, el a worde poni den libertad.

Miembronan di Recherche Diasabra mainta trempa a detene e hoben H.F.(20) y den horanan di merdia e hoben H.A.E.(18) kendenan ta forma parti di e pandiña.

Mester aplaudi e tremendo labor cu miembronan di Recherche a haci caminda a detene un grupo di hoben cu tabata dedica nan mes na kibra y drenta un cantidad di cas na Saliña Cerca y horta articulonnan.

Recherche te ainda ta siguiendo cu e investigacion pa determina exactamente cuanto lugar y cas e pandiña aki a bishita y unda tur e articulonnan cu a ser horta a keda.

Mal manera pa apoya reina

ORANJESTAD (AAN): Cientificonan rond mundo ta preocupa actualmente pa e buracionan cu tin den e capa di ozono riba e parti mas halto di atmosfera di e planeta aki.

A keda comproba cu quimiconan manera Fluorocarbon y Freon ta e.o. responsable pa e buracionan aki.

Diasabra anochi na Stadion di RCA durante eleccion di Reina Infantil, DIARIO a mira con un fanatico tabata tin un tanki grandi di Freon poni na un hoos, y

akiden e tabata prop confetti pa asina supla nan halto cu e aparato. Por bisa cu seguramente cu ta masha hopi Freon a ser supla den atmosfera, contribuyendo mas na e decadencia di e capa di ozono.

Mester pensa tambe cu te ainda cientificonan no a descubri un manera efectivo pa drecha e buraco den capa di ozono aki. Pues ta di spera cu den futuro no bolbe usa Freon djis pa lage liber den atmosfera. E ta dafino pa Aruba tambe.